

AWE YE NG'ANYI?

 Akupeshe, mulongo. Kyawama bingi pa kwiya ku nzubo ya Nkambo.

² Nalanguluka mba Nafunjilenga Kinembelo kimo, kimye kyapita kunyuma, kabiji Kyaamba mba Yesu byo afwenyenye kwipi na Yelusalema, banababwanga basutwile meso abo kabiji bamwene muzhi wazhila palepa, kabiji batatwile kusangalala ne kwamba, mba, “Pano bufumu bakebubwezha.”

³ Kabiji awe muntu wabulang'enenga, nangwa waambilenga pa lupepu lwakatataka lwakupepula Palasitaini, kabiji aye waambilenga mba bantu pano, mu mwaka wapwa, babena kwiya kuyoya mpuzha, byo bafumine mu kipachiko ne kukeketa mwaya koona, mu mukwakwa umo Yesu ne banababwanga ye bajinga pa kyokya kimye, kabiji byo bamwene muzhi, batatwile kujila.

⁴ Mwayukatu, Naketekela, pajingapo kintu kimo aba banababwanga, mu oa moba, baumvwine, mba—mba bufumu bukabwezhiwa jibiji.

⁵ Kabiji pano kimye kyauba nobe kyakumana. Kabiji Naketekela mba ayo yo nkebelo iji mu bantu, amba bufumu buji peepi kubwezhiwa ne jikwabo.

⁶ Mulongo Neville, wawama ne kafunga wapeshiwa, wajikwamba kwi amiwa na kusangululwa kubena kwiya pano pa tabbanako, mu mafukuacheche ajiko, bya kulombelepo. Kabiji Namubuujile, Nalangulukile mba kyakonsha kwikalaka kintu kyapeshiwa.

⁷ Kechi mwakonsha kwikalaka na kusangululwa kwavula ne. Kabiji bimye byavula twikalaka na milanguluko yatama ya kusangululwa. Kusangululwa kechi kwamba na mambo akuleta bantu banya ne, pakuuba ke kusangululwa kwa byobya byo tuji nabyo kala. Kabiji Amiwa . . .

⁸ Natemwa kwamba kikye, mambo Nekyambila kufuma pansi ya muchima wami. Kabiji Najinga nang'umvwino yapusanako pa mambo a tabbanako kukila na byokyajinga pa kimye kyabaya, ng'umvwino ya—yabaya ya bumupashi, nobe byo kyaubiwanga, kimye kyakunyuma; akyo ke kintu kipwisha bintu byonse, kabiji kiji nakitendekesho kyakine. Kabiji Naketekela mba Lesa ukapesha kikye kipwilo kicheche, kabiji . . . ? . . . ne jikwabo mu bulume bwakyo.

⁹ Kabiji Namona mutanchi wakushimika ubena kubiwa, kabiji Nalanguluka mba akye ke kintu kikatampe bingi. Mambo, katataka nangwa kulutwe, atweba bakote tukavuula byankondo

ne kupana ku maboko a baana betu, kabiji ne kwenda kuya na Ndandalashi ya golonde.

¹⁰ Juba jikwabo Napichile pa kipimo-kyaaafu, kya myaka fifite. Amiwa kechi nakonsha kuvuluka kyokyo ne. Kechi kibena kumweka nobe papita kimye kyabaya kufuma po nasendanga byakupotesha bya ba Chris Meisner, pepi nobe eitiini, sikisitiini, myaka eitiini. Bino batwajiletu kuntu kumo. Kyamweshatu mba pano potuji kechi pajipo muzhi watwajila ne, pakuuba tubena kukeba Umo ukeya. Kabiji awo ye Muzhi amo Lesa ye tungi, kabiji kokwa kechi kukekalapo mpelo ne.

¹¹ Lukeelo luno, byo Najikwambanga pa mutwe wa Juba ja Basemi babakazhi, kabiji ne kweseka kwikajika bamaama kechi nobe byobajinga ne, mu bukote, na mikafi, ne byonse bye, mikombo yanji, nangwa kipona kyakala kya mawilo, nangwa kipona kyakushakaminako, kabiji ne mwipika wamaluba waikala kulubaji lwanji; pakuuba maama mu lusanguko lwanji, wabwezhiwa ku bwanyike bwanji, kabiji waimana, mfumu wamukazhi ubena kubembela. Ajo jo jishinda Jondangulukilamo pe bamaama. Nakonsha kutemwa kwibalanguluka byo bajji leelo, bakote. Amiwa natemwa kulanguluka pa bintu bibena kwiya. Kabiji Nayuka mba ne anweba muji na ng'umvwina imo pa bainenu. Balangulukai byonka byo bajji mu muchima wabo. Nangwatu bavula...nobe wasapawilo byo aamba, “Bumi kechi bwamupelela ne, bino wafwainwa kwibwikala ne jikwabo, pakuuba mba emubilepo kintu kimo.” Nanchi Lesa usa kwikajika mujishinda pa kuuba mba mukekale nabo myaka ne myaka. Nanchi Amiwa njina lusekelo pa kyokyo.

¹² Amiwa kechi nayuka ene mambo ne, Nafikizha kukwe kubijika, lukeelo luno, amba Nakonsha kwamba bufuku buno, inge Nkambo waswa, pa: *Awe Ye Ng'anyi?* Kyakine kechi nayuka Amiwa mwakwikyubila ne. Bino Najinga wakaswa bingi kufikatu ne pa awala umo ne mamineti teni apita, mu misambo ya mepuzho ne mikumbu, kabiji najinga na byapusanako ne—ne lwito lwa bukiji bukiji. Nanji kukakalwa kukumanisha.

¹³ Kabiji Nakeba mba anweba mulombelele Dokotala Sam. Aye—aye ubena kwiya bingi bulongo, kabiji twasata. Kabiji Dokotala Baldwin ne ba Mrs. Baldwin bonse babiji babena kutambula lubuko. Babena kutwajijilatu bulongo.

¹⁴ Nasaka kubikapo wakatataka pa kipepala kya bakulombelela, mabaanga ano. Ao ke Harry Lease kuno, utala pa michi. Harry ke mulunda nami. Kabiji kimye kyonse kyo Namuyukile, Nalangulukilenga mba Mwinakilishitu, poso mabaanga ano, kimye mulongo wanji kyo ajikupana kukabila kwa lupulukilo lwa mweo wanji. Mulongo Mike Egan waletele...tulasiti wetu kuno, waletele sawakya. Kabiji Harry uji mumisongo yatama, amwa mu kipatela. Amiwa

kechi nayukile mba undanguluka kyabaya ne; bino, wamuleka kafunga wanji, mabaanga ano, nangwa kafunga wa kipwilo nkoaya, kabiji wakebelenga mba amiwa ngye nakumumona. Kabiji Amiwa nakeba kuya na kumumona. Nanchi, lombelelaiko Harry.

¹⁵ Tuji bingi nalusekelo muno, bufuku buno, pa kuyuka, batemwe bami kuno, kufuma ku Georgia, Mulongo Welch Evans ne kisemi kyanji. Namona, ne apo, benyi bakwabo bo Nanjikubula kuyuka, kapepo bajinga muno lukeelo luno.

¹⁶ Inge kechi Amiwa napusa ne, Namona Mulongo ne Nyenga Elmer Collins kunyuma kokwa, kufuma ku Phoenix, Arizona. Oo, obewa kechi wakingya ne. Kyamweka nobe uji na byakuvwala byobe byakukito ku ngyangi, kabiji—kabiji waiya kufumatu kungyangi. Kabiji mwabwelai ku muzhi! Amiwa kechi nakonsha kukwipuzha mba mwikale kuno ne, mambo mwatana pantu pamo pawama, monai, akyo kyawama bingi, Phoenix. Nakonsha kutemwa kwikala kokwa, juba jimo, amiwa.

¹⁷ Kabiji pano Namona Mulongo Smith papo, wa Kipwilo kya Lesa, konkwa. Mulongo Smith, wampewe kwi amiwa, buuku wenu wamucheche, juba jikwabo, nangwa keesha mabaanga, mu kimye kyapwa. Amiwa kechi na kimutangapo ne, bino Amiwa kine kamuswisha, kikulutu Nayuka mba anweba mwamunembele. Wafwainwa kwikalala wawama, Kinembelo kya kine. Lesa emupeshe. Kabiji Naketekela mba kyaitabilwa.

¹⁸ Kabiji ne bakwabo, Nakonsha kwamba. Anweba bonse mwatambulwilwa pa tabbanako. Kabiji Nanji kumvwa bulongo yewa lwimbo, lukeelo luno, wa kwa Nyenga Stricker, "Ubena kutajila mundandalashi pakutala, pe aye." Balunda nami ba Mennonite kuno, njibingi na lusekelon pa kwikala nabo muno. Kabiji, oo, anweba bonse! Mulunda muno, Naketekela, kufuma ku Illinois, mwaana wanji ubena kufyatula malekondi kunyuma, nafwainwa kwibakumanya jibiji. Kabiji bavula bingi, Nafwainwa... Kechi mulanguluke mba nemulengulula inge Nabula kwita pa jizhina jenu ne, bino Nemutambulwila anweba bonse.

¹⁹ Pano twayai tutange bufuku buno, Kinembelo kya lufunjisho, kufuma mu Mateyo kyapitala kyabu 21, kutatwila pa veeleshi wabu 1, kabiji kutanga kufika ne pansi, ne wabu 11, kunungakanyatu.

*Kabiji byo bafikile kwipi na Yelusalema, baishile,
pakufika ku Betefaji, ku mutumba wa Olivi, ponkapo
Yesu watumine baana babwanga babiji,*

*Ne kwibambila mba, Yainga mu yewa muzhi ye
mwatashopo bilungi byenu, kabiji ponkapotu pa
kutwelamo musa kutaana mbongolo ye bakasa, pamo
na mwananji: mwibakasulule, ne kwibaleta kwi amiwa.*

Kabiji umwwe muntu wimwipuzha, mukamwambile mba, Aye Nkambo wi basaka; ponkapotu ukebatuma kuno.

Abye byonse byamwekele, pakuuba mba akya kifikizhiwe kyaambile ngauzhi, amba,

Buulai...mwaana wa Ziona wamukazhi mba, Talai, Mfumu wobe byo abenakwiya ko uji wakooka muchima...kabiji waikala pa mbongolo, pa kituubala mwaana nyama wamwingilo.

Kabiji banababwanga bayile, ne kuuba monka mo ebambilile Yesu,

Kabiji baletele mbongolo, ne mwananji, bebakupikile ne bivwalo byabo, kepo aikajilepo.

Ponkapo ne bakwabo barvula ba mujibumba ke baye na kwanshika bivwalo byabo mu jishinda; kabiji bakwabo nabo benda bakosola misampi ya bichi, ne kwiyanshika mu jishinda.

Kabiji ne mabumba atangijileko ne ajinga panyuma, kasa abijika amba, Hosana kwi mwaana wa Davida: Atotwe awa wiya mu jizhina ja Nkambo; Hosana ne mwilu mwine.

Kabiji byo aishile mu Yelusalema, muzhi yense wabuukile, na kwamba mba, Awe ye ng'anyi?

Kabiji mabumba mba, Uno ye Yesu ngauzhi wa ku Nazala...

Twayai tukunyike mitwe yetu tulombe.

²⁰ Anweba Nkambo, nakumya kana byepi byo twakonsha kwamba, inge twaikale mu oa moba. Bino tubena kwikala mu juba jikatampe, apo po tubena kumupembelela Aye kwiya. Kabiji byo tubena kwinengezha, Nkambo, na kunengezha michima yetu, ne kuleta bikuta byonse byakajo byo twakonsha kubingizha kufuma mu majimi, motwaikala ne mu mantanda angi, tubena kulanguluka ne kuketekela pa kimye kyo tukamumona Aye na kwiya, kasa anji pa mbili utoka, kwiya kufumina mu bzhilo bya Lukumo, mu kupipula ne kuwamisha ino mibiji yetu yakala ibola, kuya mu mubiji Wanji wa lukumo, amwa mwakonsha kubula kutwela bubi nangwa kiyukilo kya lufu ne. Kabiji tukamumona Aye byonka byo Aji, kabiji ne kwikala nabumi, kabiji ne kumutemwa Aye mu mankulo onse akeya.

²¹ Twimusachila Anweba pa kino kipwilo ne kafunga wakyo, kabiji ne matulasiti ne bakwasho, kabiji ne pa muntu yense wiya kuno; kabiji ne pa benyi betu baji mu bzhilo byetu, aya yo mikoko ya kipaka kimo, bino yafuma mu kipaka kikwabo. Twaipuzha mba Anweba musa kwibapesha, bufuku bunu, na Kyeenyi Kyenu.

²² Kabiji ne kwitujisha pa Kyambo Kyenu, pakuuba mba byo tusa kufuma muno, bufuku buno, na lupata lwa kwikala Benakilishitu bawama kukila byo twajinga kala. Lekai tuye na luketekelo lupya mu michima yetu, kabiji na lusekelo, na kupembelela Kwiya Kwanji.

²³ Inge kyajishuko mwakonsha kwikala mukachi ketu, bakolwa ne bamanyikwa, kechi twakonsha kulubako kwibalombelela ne. Amba abo... Kwiya mu kishimikwa, bufuku buno, mo twapwila pamo mu bupopweshi, bajikwiya, bakolwa, lekai balupuke baji bulongo.

²⁴ Kabiji twakonsha kwipuzha na booba babena kutambula lubuko, mu manzubo ne bipatela, kabiji baji pa myanya ya lumanamo. Twalomba, Anweba Lesa, amba lusa Lwenu lufike pe abo.

²⁵ Twalombelela boba bapusanako, bufuku buno, aba babula kotompako ne kumona buwame bwakwa Nkambo, aba babula kuyuka byo kyalumbulula kutemewa kwi Lesa. Abo kechi bakikwatakanyatu kyo babujila ne. Anweba Lesa, lekai bambo babena kuteleka ku waileshi, nangwa mujishinda jimo, bakwatwe michima yabo, kabiji ng'umvwino yabo ya ku mubiji yalulukile kwi Anweba kizhilo kya lusa kasa kikyangye kushikika kabiji ne kushikilwa pangye, ne kutambula luzhachisho kwakubula lusa ne.

²⁶ Tukwashai, Nkambo. Abye bintu byo twalomba mu Jizhina ja Nkambo Yesu, kabiji ne ku lukumo Lwanji twaipuzha kikye. Amena.

²⁷ Bantu bazhokolokele ku bizhilo, kabiji ne mikwakwa yayujilwe na bantu, kabiji kechi kwajingapo ne malumu pa kulala bantu ne. Balajilenga pangye ku bibumba, pansi ponsetu, mambo akye kimye kyajinga kya kijilo kya lupitailo. Kabiji bantu bafumine muntanda yonse, na kupopwela pa kikye kimye. Kyajinga kimye kyakwipaya mwanamukoko. Kabiji zye... Kyaimejileko bupokolweshi bwabo kufuma mu Ijipita, mu buzha. Kabiji balamanga kikye, kila mwaka. Pa mwaka pa mwaka akye kijilo kyalupitailo kikatampe kyaikalangako. Kabiji kyajinga kintu kimo kyakila bingi mu kuwama...nangwa bijilo bya bupopweshi bwa Kiyudeya, mambo kyalumbulwile mba kyo kimye kyo bapokolwelwe.

²⁸ Bantu bonse batemwa kulanguluka pa kyokyo, kimye kyo bapokolwelwe. Kyakuba mba umo mwi atweba, bufuku buno, wakonsha kubwela ku kimye kyo twapokolwelwe! Byo kyalumbulwile kwi atweba!

²⁹ Nakonsha kuvuluka mu byami byo napichilemo, muchima wa bunsongwalume byo akabijilenga kukwata Lesa. Nalangulukile mba, "Oo, inge Nakonsha kuya na kukokosha pa kibelo Kyanji, ne kwamba kwi Aye pa kakimye kacheche!" Kabiji, nangwa byonkabyo, mwayuka jishimikila jami. Nakebele

kitepala ne pezulu, kabiji nafwajilwe kunemba kalata kwi Aye, mambo Amiwa kechi nakonsheshe kwamba kwi Aye ne. Kabiji Nayukile mba Aye waikelenga mungye, mambo Namumvwine Aye, kabiji Namwene kwenda Nkwanji mungye. Kabiji ji—jimo, jishinda jayukanyikwa jakala Njo nayangamo na kusonsola nangwa kuya na kuloba. Nalangulukile mba, “Nsakwikipedia pa kichi, ne kwiyituma kwi Mr. Yesu.” Mu musango umo pakuuba mba kijikila kyami kifume ku muchima wami.

³⁰ Oo, abwa bufuku, kulutwe! Nakonsha kulubako myaka yami, Nakonsha kulubako ne jizhina jami kimye kimo, bino kechi nakonsha kulubako awa awala ne Aye byo apokolwele kufuma ku bubi. Kintu kimo kyamwekele, mukachi kami, akyo kyakwashishe mu maawala akatampe a mufishi. Awala wa bupokolweshi bwami, kinemenezhi kya bubi kyafumine pe amiwa, kabiji Naikajile ke muntu mupya. Amiwa naikala kilengwa kipyia mwi Kilishitu Yesu, kufumatu ponka pa.

³¹ Kabiji baabo Bayudeya, baiyanga, kila mwaka. Kabiji kwajinga aya—aya nsulo ya meema mukachi ka kipwilo. Kabiji bajilenga—shinkwa, ne mabula alula, ne mwanamukoko, kabiji batomene kufuma ku iye nsulo ya kipwilo. Kabiji basangalelenga pamo mambo a kuuba mba Lesa wi bamwesheshe lusa. Nanchi, akye byo kyajinga kimye kya kijilo kya lupitailo, kabiji kechi kyajingatu kijilo kya lupitailo, pakuuba kyajinga kijilo kya lupitailo kyapananako.

³² Mwayukatu, kuji kimye kimo kyo tuyu ku kipwilo kabiji... Atweba kimye kyonse twatemwa kuya, bino kimye kuji bintu bimo byawama bimweka.

³³ Kabiji akye kyajinga kimo kya byobya bimye. Mwela wayujilwemo na kuketekela, nobe byonka bya kiji leelo. Meso onse abooba bamutemenwe Aye a mupembejilenga Aye amba afike ku kibelo kya sakwa.

³⁴ Kabiji Naketekela mba ke mwingila mukatampe bingi mu jaleelo, ku booba batemwa Aye babena ku mupembelela Aye. Mwela wayulamo na kuketekela.

³⁵ Byo, tubena kwikala mu jino juba, ntanda kine, yaikala ke lukungu lukatampe lwa byubilo byatama. Kabiji saayasi ubena kwitubula mba, “Kwashala mamineti asatu kufika pakachi kabufuku.” Kabiji Naketekela mba mwatangilenga, nobe Ami, juba jikwabo, jishimikila ja yuwe jenulo wa mazhita, waambile, mba, “Inge kwaikalapo nkondo ikwabo, ikekatalu mamineti abiji nangwa asatu.” Aa moba akala a kulwa, ne kuloza mata, ne kupoya bimbo bya balubwala, apwa. Baamba mba nkondo yalondelapo ikekatalu mamineti abiji nangwa asatu. Juba jimo, muntu umo walubakana-mumilanguluko ukafumyapo kizhiko ne kuloza oa mambomba. Kabiji inge bauba byobyo, tuji na

bifulo byakutelekelapo, konse konse, ne kwikiloza jikwabo. Ntanda kechi yakonsha kupuluka kyokyo ne.

³⁶ Muntu yense pa kijilo kya lupitailo wayukile mba kintu kimo kisakumweka, bino kechi bayukile kana kyajinga kika ne.

³⁷ Kabiji abyo byobyo kiji ne leelo. Muntu yense wayuka mba kintu kimo kyafwainwa kumweka. Muntu yense wayuka kyokyo. Wakonsha kwamba ku ndengamambo, wakonsha kwamba ku musulu, mwakonsha kwamba ku muntu uji yense, kabiji, oo, ke kimye kyakubula mutende mu ntanda.

³⁸ Bino wakonsha kwamba ku mwanamulume nangwa mwanamukazhi ubena kumupembelela Kwiya, kabiji lukumo luji pa kilungi kyabo, kasa kyasama. Abo babena kupembelela kyokya kimye kikatampe. Nanchi mwela yense wayulwamo ne jikwabo, nakuketekela kintu kimo kumweka. Ntanda kechi yayuka kibena kukeba kumweka ne, pakuuba Kipwilo kya Lesa mumi kyayuka bintu bikamweka. Abo bayuka mba tolopita ikavuma, kabiji tukamumona Aye kasa eya, nakwikila kufuma mu Lukumo, pa mbili utoka, kabiji ne mazhita a Mwiulu kassa abena kumulondela Aye. Kabiji ne boba bafwila mwi Kilishitu bakashikulwa ne kumusambakana Aye mulwelele. Abyo byo tubena kupembelela. Tubena kwikikabila.

³⁹ Kabiji twabulwa mba myeo ya babo bamaama, ne bakwabotu, bo twajkwambapo lukeelo luno, bajitu mushi ya kitapisho kya kwa Lesa, babena kubijika mba, "Kwashala bimye binga, Nkambo? Bimye binga?" Bamaama babena kukeba kumumona nobe byonka obewa byo ubena kukeba kwi bamona. Kabiji batemwe betu babena kukeba kwitukumanya nobe byonka byo tubena kukeba kwibakumanya.

⁴⁰ Kukekala kusambakana kwabaya bingi, inge Aye waiya! Nakukumanya batemwe betu ne kwibamona mu lusanguko lwabo, kabiji ne kutumbijkwa, ne kwendauka na buswanyi bwalusanguko, na kumona byubilo byabo, byo byapipulwa, bukimote ne kwikeyepesa kabiji ne mu kuzhindama. Kabiji kechi kikekala kyabaya ne kukatazha ne, kutolauka ne kusukana ne, mambo atweba tukekala pamo Peenape.

⁴¹ Oo, aye ke wavulang'anako yo tubena kwikalamo, kechi kujipo kimye kya kintu kyabulwako ne, bya kukajilatu, ne bya kwisukasuka, byakwangata, kika, ke juba jakatazha.

⁴² Pano, byo bapembelejilenga kintu kimo kumweka, kyatamine bingi kyakuuba mba bavula ba booba bajinga pa kijilo kya lupitailo kechi Bamumwene ne. Nangwa byonkabyo, bayukile mba kintu kimo kisakumweka, bino nangwa byonkabyo kechi bamumwene Aye ne.

⁴³ Nanchi byobyo kikekala pa Kwiya kwa Nkambo. Muji bantu bavula bingi babula mutende, leelo, bayuka mba kintu kimo kyafwainwa kumweka, bino abo—abo kechi bakamumona Aye ne. Mambo Aye ukeya mu bimye byazhindama bya pakachi

kabufuku, kwiya na kusenda akya Kipwilo kicheche kibena kukabila ne kupembelela kabiji ne kumuketekela Aye. Aba bo bonka bo Akeya na kulonda. Bavula ba muntanda babena kwikela kulubaji lwa bwame bwa ntanda, ne kujisha myeo yabo na bintu bya muntanda, kechi bakayuka kyamwekele ne, poso Kipwilo kyaya mu Lukumo, mambo Aye ukeya nobe ngivi bufuku na kwi basenda. Nanchi twakonsha kumona mba twabwela jibiji pa kifulo kimo. Pano twatana kuuba mba, akwe, kuketekela, amba Lesa wiya ku booba... Kupita mu Binembelo byonse, kyajingatu kintutu kimo. Amba abo... Aye kimye kyonse umwekatu ku bonka babena ku mupembelela Aye, kimye kyonse bonka babena kukeba Kumumona. Kabiji Naketekela mba alo lo luketekelo luji mu michima yetu bufuku buno.

⁴⁴ Kyajinga pepi nobe bang'ondo sikisi bapita, Naketekela, Napainenga lushimuno ku bantu bambo. Kabiji Naambile mba, "Oo, kwikilanguluka mba, kimye kyonse Aye ukeya!"

⁴⁵ Kabiji kyandengejile kwamba kyokyo, Naambilenga pe Mulongo Bosworth. Byo Naile na kumona awa wazhijikwa mukote, byo twaumvwine mba ubena kufwa, myaka eite-neikwabopo, mukazhi ne Amiwa twayilenga ku...konka na kumumona aye kasa akyangye kufwa. Amiwa naambilepo kintu kimo kwi aye. Natemwa kumona bazhijikwa inge babena kutwela mu Lukumo, kabiji Nakonsheshe kumumona. Kabiji twasokele mataila a ku motoka.

⁴⁶ Pakuuba byo Nafikile konka, ne kutwela lubilo pa kibelo, mu koona mucheche mwalajile yewa mushakulu wakala. Aye wasutwile mutwe wanji byo amwene mbena kwiya. Anji akote, maboko akooka akwachile, na misunyi yazela. Kabiji watambikile maboko anji kwi ami. Kabiji Namukwachile mushingo yanji ne kubijika, "Bataata, bataata, makalaki a Isalela, kabiji ne bambili babo," mambo aye wajinga wazhijikwa, muntu wabulesa.

⁴⁷ Kabiji Naambile mba, "Mulongo Bosworth, Nakeba kukwipuzhako kintu kimo. Bushe waketekela mba usa kwikalatu bulongo nyi?"

Aye waambile mba, "Oo, Amiwa kechi ne mulwazhi ne."

Naambile mba, "Kyawama, lukatazho lwepi?"

⁴⁸ Aye waambile mba, "Amiwa mbena kuya ku Nzubo." Aye waambile mba, "Amiwa nakoka, kabiji Amiwa napwamo. Kabiji Amiwa mbena kukebatu kuya ku Nzubo."

⁴⁹ Naambile mba, "Nanchi walanguluka mba ubena kufwa?" Naambile mba, "Nasaka kukwipuzhako kintu kimo. Kubwela kunyuma kwa myaka sebete-ne ikwabopo ya mwingilo, ng'anyi mineti wajinga wawamisha? Mwakonsha kwamba kwi amiwa, mwane, kabiji umbule kintu kyawama kyo wajinga nakyo,

mulwendo lobe, kyo wakonsha kubala mba kyajinga kimye kyawama bingi.”

⁵⁰ Amiwa nkekala na bumi bwa kumona myaka yanji, Amiwa kechi kalubako ne, aa meso anji byo antajile, peulu ya oa magalasi. Aye waambile mba, “Mulongo wami mutemwe, akye kyo kimye kyami kyawamisha bingi kya bumi bwami. Amiwa kechi nakonsha kuvula pa kimye kyawamisha kukila pa kino kimye ne.”

⁵¹ Namutajile mu kilungi, kabiji Naambile mba, “Mwane, wayuka mba obewa ubena kufwa nyi?”

⁵² Aye waambile mba, “Mulongo Branham, Amiwa nalala pano, na kupembelela mineti uji yense Aye kwiya nakushikula kibelo kabiji ne kwiya eye, asende kuya Nanji ku Nzubo.” Ajo jo jishinda ja kufwilamo. Ajo jo jishinda ja kuyilamo.

⁵³ Kabiji nobe byo mwayuka, mba, pepi nobe ma awala abiji kasa akyangye kufwa... Aye wajinga, walalatu wasesuka kukila pa moba abiji. Kabiji byo abwelele pa bututulu, wabukile mu kibamba, kabiji watatwile kwamba ku mukazhaji. Kabiji, ponkapotu, wamwekele nobe ubena kumona. Kabiji waimwinenga maboko, pa awala umo nangwa kukilapo, nabalunda, abo bafwile papita foote nangwa myaka fifite, abo bo aitabizhe mu kipwilo kyanji. Bapakene maboko na bainanji kabiji ne bashanji. Poso byo ajinga... bumi byo bwafumine mu mubiji wanji, walajile pa pilo waponena ne mutulo walala, mu maboko a Nkambo Yesu. Kechi kujipo kintu kimo kya kumwingijila Aye ne, ne kumuketekela Aye.

⁵⁴ Kabiji byo Naambilenga ku yuwe muntu pa kikye, kabiji ne kubulang’ana kikye kyakupitamo, Naambile kikye. Naambile mba, “Mwane, oo, bushe kechi kyakonsha kwikala kyawama nenyi inge twamumona Aye? Oo, inge Aye wakonsha kwiya leelo!”

Aye waambile mba, “Mulongo Branham, kechi uchinyishe bantu tuyewa musango ne.”

Naambile mba, “Walumbulula ka?”

⁵⁵ Aye waambile mba, “Oo, kechi weseke kubuula bantu amba ntanda ibena kwiya ne, nangwa mba Kilishitu ubena kwiya. Kibaletela moyo.”

⁵⁶ “Oo,” Naambile mba, “ine. Nalombako lulekelo lwa mambo. Kubooba babena kumupembelela Aye, ke mbila yawama bingi yo bakonsha kumvwa, amba Yesu ujitu pepi na kwiya kabiji ne kusenda Kipwilo Kyanji.” Bukote bukalulwa ke buyufi. Lusekelo lukapanyiwa mu kifulo kya bulanda. Bumi bukapewa mu kifulo kya lufu. Ubula kufwa na byubilo byawama, bikapipulwa. Oo, kikekala kimye kyawama bingi, kuyuka mba Aye ukeya!

⁵⁷ Abo bamupembelejilenga Aye. Abo ba muketekejilenga. Kabiji byo Aishile, twatana kuuba mba kwajinga mabumba

abiji. Jibumba Jimo jajinga ja Kwanji, kabiji jikwabo kechi jajinga ja Kwanji ne.

⁵⁸ Kabiji ajo jo jishinda jo twikitainamo leelo. Akyo kyo kika, kwiya Kwanji, kimye kyonse kwabanya bantu. Kimye kyonse, inge mwatana Yesu, mukatana kuuba mba kuji bambo bazhokoloka bakana Kyokyo. Awa ke Satana. Kabiji, leelo, umvwe twalanguluka pa kikye, kechi tumona lupipu lwabaya ne. Kijitu pamo. Bantu bapimpula, bino mupashi wa bantu kechi wakingya ne.

⁵⁹ Nanchi pano byo bantajile ku kibelo bamumwene Aye waiya, wakajila pa mucheche, mbongolo utoka, kechi kyakukumya ne banababwanga batatwile ku—kubijika mba, “Bufumu bwa Mwiulu bwamweka!” Bantu bamunyemenejile Aye, kabiji Yelusalema yense wasukanyinshiwe. Pajipo kintu kimo pa kikye, inge Yesu waiya, kimye kyonse kileta kusukanyishiwa. Kabiji muzhi yense wasukene. Kabiji abo—abo kechi bakonsheshe kwikifya ne.

⁶⁰ Kabiji basapwishi ba mujoja juba balondolwele kyalengejile kukwe kusukana, mambo kyajinga pa kijilo kya lupitailo. Kabiji babijikile mba, “Awe ye Ng’anyi?” lubesha byo lwapiipulwe, kabiji ne kwiya kwa Nkambo Yesu, ku Yelusalema, kyapipwile lubesha na byakuketekela, kimweka nobe bafunjishi bafwainwa kuyuka byaubiwenga. Kyamwekele nobe ng’anga mukatampe wikiyukile. Kyamwekele nobe bonse bang’anga bakwabo bafwaijilwe kwikiyuka.

⁶¹ Kabiji kechi kyapipulwa nangwa pacheche ne, leelo, mambo Mupashi Wazhila ubena kutangijila Kwiya kwa Nkambo Yesu. Kabiji Mupashi Wazhila byo atatwile kukumbana pa ntanda ponse, kusangululwa kwa mujilo kwaponene, konse konse, biyukilo bikatampe ne byakukumya byaubiwa, byalubuko byaubiwa, bya bungauzhi byaubiwa. Kubungizha kwa mapesho a batumwa abwela jibiji mu Kipwilo. Nanchi, byonka byo kyajinga kyokya kimye, byo kiji ne kino kimye, mupashi wa muntu wabula kwitabila ukijilatu mba, “Awe ye Ng’anyi?”

⁶² Bamo mwi abo baketekejile mwi Nkambo Yesu, ne kwamba mba Aye wajinga Muntu wawama. Bamo ba mwiabo baambile mba, “Aye ke Muntu wawama.”

⁶³ Abyo byo bamba leelo. Beseka kumubika Aye nobe Napolyoni, wankondo. Abo beseka Kumubika nobe—nobe George Washington, muntu wa bukine. Bino Aye wajinga wakila pa kyokyo.

⁶⁴ Bushe mwajikumona kutanga kwa Kinembelo nyi? Abo baambile mba, “Awe ye Ngauzhi ufuma ku Galileya.”

⁶⁵ Kabiji beseka kwamba kintutu kimo ne leelo, inge bamona kukwe kusukanya kukatampe kwa Nkambo: mu kubwezha jibiji, ku bututulu bwa mubiji, bakolwa ne bamanyikwa; pa kumumona Aye waingijisha Mupashi Wanji mu Kipwilo Kyanji,

mu kuyuka milanguluko ya bantu; ne kumumona Aye wauba byonka byo Aubile kimye kyo Ajinga pano pantanda, na kufikizha byobya byo Aambile mba bikobiwa; kyakine, bipwilo ne bantu byo bauba, baipuzha kikye, “Awe ye Ng’anyi?”

⁶⁶ Abo kechi bayukile ne kana Yesu wajinga ng’anyi, mambo kafwako nangwa umo wa mwiabo wamuyukile Aye ne, kupichila mu masukuulu abo. “Ng’anyi sukuulu ye Afuminemo? Ng’anyi sukuulu wa mamboawama Aye ko afumine?”

⁶⁷ Kabiji nanchi byo byokiji ne leelo. Bantu bavula bashingwa manyi na Mupashi Wazhila kechi bafuma ku sukuulu ne. Abo ke bipe bya kusalulula Lesa mwine. Pakuuba biyukilo ne bya kukumya, kabiji ne bya kukumya bya lailwe mu Baibolo, bikwatakana na yuwe Mupashi Wazhila byo Enda mukachi ka bantu.

⁶⁸ Kabiji baamba leelo mba, “Ng’anyi sukuulu ko bafuma?” Bukiji bukijitu inge mwatwela mu muzhi, mwaikala na kusangululwa, “Ng’anyi dinominesheni yo utanwako?”

⁶⁹ Naginga na misambo ya mepuzho ne mikumbu Pakitanu mabaanga, na pulisiti wa Katolika wa ku Loma kufuma ku kipwilo kya ki Irish mu Louisville. Kabiji kechi papichile kimye kufuma po bandumbulwile ne, muttu wafunda bingi, aye waambile mba, “Mr. Branham, ng’anyi dinominesheni yo uji nayo?”

Naambile mba, “Amiwa kechi njipo naumo ne.”

Kabiji aye waambile mba, nanchi, “Obewa wantetekelwe nyi?”

Naambile mba, “Ee, mwane.”

Aye waambile mba, “Ing’anyi wakutetekele?”

⁷⁰ Naambile mba, “Aye Nkambo Yesu wampele Mupashi Wazhila, mba sapwile Mamboawama, kabiji wampele ne mwiningilo.” Kyawama, ako ko kutetekwa ko tubena kukabila.

⁷¹ Yesu kechi waambile ku baana babwanga Banji mba, “Yainga ku . . .” Amiwa kechi mbena kujimbulula bibye bintu ne, bino byaikala juba jabyo. Aye kechi waambile mba, “Yanga, na kufunda kwikala wamwingilo ne, pa *myaka-yavula* mukananga ne.”

⁷² Aye waambile mba, “Pembelelai mu muzhi wa Yelusalema, poso mu kayulwe na Bulume bufuma Kwiulu.” Aye waambile kyokyo ku bantu balubile kufwachika mazhina abo. “Kabiji panyuma ya kikye, Mupashi Wazhila waiya pe obewa, apo po mukekala bakamonyi Bami, bonse mu Yelusalema, Muyudeya, ne mu Samaliya, kabiji ne konse kwapela ntanda.” Ayo yo milaye.

⁷³ Atweba kechi tujipo na kyanembwa mba Yesu waile ku sukuulu uji yense ne, nangwa kupwisha kufuma ku sukuulu

iji yense ne. Nangwa byonkabyo, kuji masukuulu avula bingi ashimikwa mu Jizhina Janji, mambo abupopweshi, kukila byo kiji na bikwabo—na bikwabo byaikalako kala pa kyaalo. Atweba kechi twajingapo na—na kyanembwa kyonse Kyanji kya kuya ku sukuulu ne. Bino, nangwa byonkabyo, kuji ma sukuulu avula bingi ashimikwa mu Jizhina Janji kukila byo kiji na jizhina jiji jonse pantanda, ma sukuulu. Atweba kechi twayukapo Aye kunemba buuku ne. Nangwa byonkabyo, kuji mabuuku avula bingi a nembwa pe Aye kukila pa byonse byakutanga byanembwa. Kabiji, leelo, Baibolo Wanji ke Buuku wayukanyikwa bingi mu ntanda yonse, mu byonse byanembwa byakutanga.

⁷⁴ Bino, mwamona, mu juba ja lupepu, abo babijikile mba, “Awe Ye ng’anyi?”

⁷⁵ Monai, Lesa utola kintu kyamweka nobe kechi kiji na kinto ne, pakuuba mba mufumepo kintu kimo mukikye. Akyo kyo kimulengela Aye kwikala Lesa.

⁷⁶ Kabiji byo Bamumwene, kasa eya pa kibelo kyasakwa, bambo baambile mba, “Aye ke Muntu mukatampe bingi.”

⁷⁷ Baamba kyokyo leelo. Kuji masukuulu a mambo awama a kufunjisha, leelo, amba Yesu wajinga Muntu mukatampe, amba Aye wajinga Muntu wawama. Bamo mwi abo baamba mba Aye wajinga ngauzhi. Pano, inge Aye wajingatu ngauzhi, nangwa Muntu wawama, atweba nishi tuji mu bubi bwetu. Aye wajinga wakila pa ngauzhi. Aye wajinga wakila pa Muntu wawama. Nangwa byonkabyo, Aye wajinga Lesa-Ngauzhi. Bino Aye wajinga wakila pa kyokyo. Aye wajinga Lesa wamweka mu mubiji, pakuuba mba afumyepo bubi.

⁷⁸ Kabiji byo Aishile, kasa aji panyama, bantu bavula baambile mba, “Aye ye ubuka. Oo, twamumwene Aye washikula meso ampofu. Twamumwene Aye walengele muntu kilema kwenda. Twamumwene Aye wapaine milombelo, kabiji ne mashika aleka mu mwaana.” Bino, pano, bayewa musango bamulondejilengatu mambo abashinkwa ne masabi.

⁷⁹ Kabiji abyobiji mabumba leelo, bavula. Inge kuji ubuka, kika, abo—abo ba Mulondela, kabiji Aye ujitu—Aye ke kizhiba kya meema. Inge bakolwa, banyemenako, ne kwamba mba, “Oo, anweba mwane mundombeleleko amiwa, pakuuba mba Nkambo Yesu ambuke amiwa ngikale bulongo?” Kabiji bukiji bukiji aku bafumatu mu kipatela, nangwa pa mwanya wa misongo, babwela baya muntanda, nobe kabwa wabwela ku malashila anji, nangwa nkumba mulume wikata mumateshi anji, monka mwaambilila Kinembelo. Bamulondelatu Aye na mambo abuwame bobakonsha kutambula kufuma kwi Aye. Abo bamwingijishatu Aye kwikala ke—ke kichi kya kiyukilo, nangwa—nangwa kintu kimo kyo—kyobakonsha kufumya kwi

Aye, kabiji kechi bakonsha kumwingijila Aye ne. Aja jibumba jikiyat u kulutwe ne leelo.

⁸⁰ Kwajinga bambumba naini babukilwe, kabiji umo ye wabwelele na kumusachila Aye. Nangwa kana bajinga teni? Abo, yekatu umo, wabwelele na kumusachila Aye, kabiji bashala bayiletu kulutwe, kwakubula ne kusata.

⁸¹ Kabiji umvwe bantu mu America, babukwa na Bulume bwa Lesa, babwezha michima yabo kwi Lesa, kwakonsha kwikalaka kusangululwa mu kino kyaalo kyakonsha kushika kikulwa kya maalwa, akyo kyafwainwa... Mashitolo mo bakumba ne mashitolo amaalwa a wisiki kechi byakonsha kwikalako ne. Bipwilo byafwainwa kuyula. Bishimikwa byabisela kechi mukekalanga bantu Pamulungu bufuku ne. Kabiji kwakonsha kwikalaka kusangululwa, mu kyaalo kyonse. Pakuuba inge bekimona kyaubiwa, bintu byuba Lesa, abo bakibijikatu mba, "Awe ye Ng'anyi? Awe ubena kwiya ye ng'anyi? Kwepi kobafumine? Awe ye ng'anyi? Ng'anyi bulume bo engjisha?"

⁸² Kechi nalubako ne, ku Johannesburg, South Africa. Amiwa popo nafikiletu, pepi nobe mamineti sate kasa akyangye kufika ne, mu ndenke. Najinga moba ne mafuku asatu mwiulu, Najinga wakooka bingi kechi nakonsheshe ne. Ba—bantwajile ku kibaza kyabisela kwapwijile bantu pepi nobe fifite nangwa sikisi sauzande. Kabiji aku mfikatu ku pulatifomu, ponkapo Mupashi Wazhila... Namwene, kwaishilenga konka ku kifulo, sa—saakya. Kabiji wajinga na kiyukilo palutwe, "Durban." Namwene mwanamulume mwanyike umo waubilenga bisela wafuma kwi bashanji ne bainanji, na mukupa umo sikisi nangwa eiti ichezi kwipipa kukila mukwabo. Aye wamvwajile jitoka, na mishipi ya kwachijila tolosi wanji. Kabiji Namwene mwanamulume mwanyike. Nantajile kunyuma jibiji. Kimwesho kyaya. Kabiji pano, mu kakimyetu kacheche, Namwene akya Kyeya kyakobamine peulu ya mwanyike, amwa mu jibumba. Kabiji Nantajile. Nalangulukile mba, "Namumwenepo kuntu kumo." Namutajilengatu, kabiji akya Kyeya kyatwajijiletu na kunkobama peulu yanji mu mamineti acheche. Kabiji Napembejilenga wakututulula pakuuba mba ayuke byambo byalondelapo. Kabiji Namwene awa mwanamulume mwanyike waimana, wataya pansi mikombo yanji, kabiji ne mukupa wanji waipipa-sikisi-ichezi waesekejiletu pamo na mukwabo.

⁸³ Kabiji Naambile kwi Mr. A. J. Schoeman; uji mu Lukumo, bufuku buno. Naambile mba, "Mr. Schoeman, pituluka mu byambo byami. Ke kimwesho."

Aye waambile mba, "Kyawama bingi."

⁸⁴ Kabiji Naambile mba, "Mwanamulume mwanyike waikala kunyuma uji na jitoka, kabiji ne mishipi ya kwata tolosi, aye wafumina ku muzhi watelwa mba Durban, pepi nobe fifitiini aduleendi mailoshi kukilang'anya kyaalo, mu saakya. Kabiji aye

wabombokatu ku bashanji ne bainanji, kwiya kuno. Bino aye waketekela mwi Nkambo Yesu, kabiji aye uji na mukupa umo waipipa sikisi ichezi kukila mukwabo.”

⁸⁵ Kabiji awa mwanamulume mwanyike watolokele. Wajinga byobya, waimana, na kweseka kumvwa mikombo yanji. Kabiji Naambile mba, “Mulunda mwanyike, aye Nkambo Yesu wakubuka.” Kabiji ponkapotu mukupa wanji wafikile ku sikisi ichezi, kwesakana pamo, na mukwabo. Kabiji baletele mwanamulume wakyanyike ku pulatifomu, kabiji ba dokotala ba mupimine. Mumona kipikichala kyanji mu buuku wami.

⁸⁶ Naimene popa maminetiachehetu, Namwene mucheche, motoka wa mazhamatamba na kwiya mu mukwakwa kabiji watezhimukile. Wazhokolokele, kubwela lunyuma, ne kwiyimba mu kichi. Mwanyike, nsongwakazhi wabaya-mutwe wajinga na...nyuma yamokoka. Kabiji Naambile mba, “Namona mucheche, motoka wa mazhamatamba watezhimukila mu kichi, kabiji mwanyike nsongwakazhi wabaya-mutwe wa myaka pepi nobe myaka eitiini uji na nyuma ya mokoka. Uji mulukatazho lwabaya bingi.” Kafwako nangwa umo wakumbwilenga ne. Kabiji Amiwa kechi nakonsheshe kumumona kuji konse mu jabaya ne, jibumba jikatampe ja bantu. Kabiji Naimene popa pa maminetiacheche. Naambile mba, “Mwakwatakanya. Kiji... Kechi mwikale bakufwanyikizha ne. Ke Nkambo Yesu, mu Bulume bwa lusanguko. Aye watumine Mupashi Wazhila kutwajijila na kwingila mwingilo Wanji.” Kabiji ponkapo Namwene kimwesho kyaubiwa jibiji. Kabiji kechi Namwenepo mwanamukazhi wakyanyike ne.

⁸⁷ Kabiji ponkapotu, kulutwe yami kwaimene kyokya Kyeya, byonka byo mwikimona pa kipikichala. Kabiji Kyaimene ponkapo. Naendele kuya konka, kabiji walajile, kunyuma ya pulatifomu. Naambile mba, “Inetu wakyanyike, aye Nkambo Yesu wakulenga kwikala bulongo.” Kabiji watatwile kujila.

⁸⁸ Bainanji baambile mba, “Oo, ine! Kechi kumubuula mba emane ne!” Waambile mba, “Inge wakonsha kwenda, usa kufwa.”

⁸⁹ Kabiji awa inetu mwanyike waimene ku maulu anji, kasa abijika, ne kutakaika Lesa. Kabiji bainanji bapungijile ne kuponena pa mwanya walajilepo nsongwakazhi.

Kyo kika?

⁹⁰ Pakyonka kimye, mwanamulume umo kajimbulushi waimene kunyuma kokwa, kabiji waimene na kulu kumo pa kipona kimo, kabiji kukwabo pa kikwabo, ne kwamba mba, “Anweba, bena America! Nakukambizha obewa kumbula Jizhina jo ubilamo bibye! Kabiji ng’anyi dinominesheni ya kipwilo yo utanwako?” Mwamona?

⁹¹ Kijitu pamo. Abo kechi bakwatakanya ne. Abo kechi babena kupembelela bibye bintu ne. Bipwilo kechi bibena kupembelela

Kwiya kwa Nkambo ne. Kabiji Mupashi Wazhila uji muno na kushinikisha Kwiya Kwanji, pakuuba mba Kiye kufikizhiwa. Kikale kyabaya . . .

Uji yense ubena kukeba kuya mujishinda janji. Abyo byobyo kyajinga kokwa. Kila jibumba jajinga na milanguluko yabo.

⁹² Bino ajo kechi jo jipuzho bufuku buno ne. Akyo kechi kyo Mbena kwambapo ne. Bino jipuzho jo Mbena kwimwipuzha, ke jino, mwalanguluka mba kyo Kika? Kino kyatala kwi anweba. Ing'anyi Awe ubena kuya peulu-ne-panshi mu byaalo? Kechi bantu ne. Bantu kechi bakonsha kuuba byobyo bintu ne. Ye Ng'anyi ubena kwamba kabiji ne kwamba ku bantu mu jibumba, nobe, "Waikala *papo*, uji *ponkapo*," kabiji ne mampuzha apusanapusana mu mbung'eno, kimye banabakazhi ne banabalume po baletwa muno, babena kufwa? Awe ye Ng'anyi?

⁹³ Awa mwanamukazhi mwanyike wajikutwela mwakubatizhila lukeelo luno, amba milungi isatu yapita, wafwilenga na kaasa wa pakikoba, wikala mu Mukwakwa wa Maple, Mrs. Baity. Kabiji Naipwizhe madokotala basatu bajinga nanji. Kechi wajinga na bumi bwakwikala pantanda ne, uji na baana foolo nangwa faivi, kabiji bainanji bo be balama. Bamaama baambile mba, "Bill, kechi ukeya pa nzubo jibiji ne."

⁹⁴ Kabiji Naile konka koajinga, kabiji aye Nkambo Yesu waambile, "ABYO BYOBYAAMBA AYE NKAMBO, inge waya ku kipwilo ne kulaya kubatizhiwa mu Jizhina ja Nkambo Yesu, kabiji ne kumwingijila Lesa, aye ukaya ku nzubo, bulongotu."

Kabiji Namwipwizhe mba, "Wakonsha kuuba kikye nyi, inetu?"

⁹⁵ Kabiji waambile mba, "Anweba kyonse kyo musa kwamba, Amiwa ke kyuba." Ponkapotu kukola kwalekele. Moba asatu palutwe, wajinga ku nzubo, kabiji badokotala kechi bakonsheshe kutana kaasa nangwa pacheche ne.

⁹⁶ Awe ye Ng'anyi wiya mu Jizhina ja Nkambo? Yenu Ng'anyi? Ke Mupashi Wazhila wakwa Lesa. Ngaandangulukilo yobe pakikye Yoika? Ngaandangulukilo yobe, byo wayuka kafunga obe? Kabiji pa kwikalala mu bibye bipona kuno, bantu bafuma kusa ya tauni, baikala na kashita, kasa baikala na . . . Apo paikala mwanamulume, pantu pamo papo, mulongo wa ki Mennonite, ponkapo, ukolwa na kashita. Kechi namuyukapo nangwa kumumonapo ne, kafwapo nangwa kimo pe aye ne. Kabiji ponkapotu, pepi nobe myaka ibiji yapita, Naketekela, nangwa kintu kimo, ee, myaka ibiji, aye Mupashi Wazhila wamwichile, ne kwaamba mba "ABYO BYOBYAAMBA AYE NKAMBO." Aye kechi wakikalapo nakyo jibiji kufuma pa kyokya kimye ne. Awe ye Ng'anyi? Awe ye Ng'anyi?

⁹⁷ Awe mwanamukazhi waikala papo, Pamulungu wapita, kimye kyapeleleko kyo Najinga kuno, nafumine kuntu kumo

ku Illinois. Juba jalondejilepo...Na kitumbwa kikatampe mu mubiji wanji, akya kyajinga kilonda. Kabiji ne bamo batala pa michi ya saayasi mu Illinois bamutwajilenga ku kiliniki kikatampe, kuuba mba bakamwigijilepo, pa Kimo. Kabiji wipachikizhetu kutwela. Kechi na kimumwene po nangwa kumumvwapo, mu bumi bwami bonse ne. Kabiji ponkapotu, Mupashi Wazhila wamunyeng'amijile, kabiji Kyamubuujilwe byo aji, kwepi ko afuma, kabiji wafwaijilwe kutumbulwa juba jalondejilepo. Baanga bajinga muno pa kyokya kimye, bamwene byobya? Kabiji ne kumona ma sawakya akunyuma. Juba jalondejilepo, byo ayile kwi dokotala, bamutwajile kufuma ku kiliniki kimo ne ku kiliniki kikwabo, kabiji kechi bataine kijimo ne.

⁹⁸ Awe ye Ng'anyi? Oo, Lesa ubai lusa! Awe ye Ng'anyi ubena kuuba kikye? Mwakonsha kwamba mba kyajinga kafunga wenu? Kafwako. Bushe mwakonsha kwamba mba bantu kechi bajipo na kyakwingila nakyo ne? Kafwako. Ke Mupashi Wazhila, aye Mupashi wajinga pe Nkambo yetu Yesu. Kabiji ne Kwiya Kwanji na kukwatakana Ayemwine na Kipwilo Kyanji, uji bingi pepi kyakuuba mba Aye ubena kusansanya Kyeya Kyanji kikatampe kyazhila, pakuuba mba akuule, kabiji ne kuleta muluvwang'ano lwa bupopweshi, Kipwilo kya Lesa mumi, na mambo a Kushikulwa ako kujitu pepi. Amena!

⁹⁹ Awe ye Ng'anyi? Amiwa kechi nakonsha kupana mukumbu ku jipuzho jenu ne. Amiwa kechi nakonsha kwimukumbwilako anweba ne. Bino Amiwa nakonsha kwikumbwila amiwa mwine. Kabiji pa yuwe desika wazhila, bufuku buno, mu matwi ajije, jibumba, kabiji aa—aa apotelwe Mashi a Nkambo yetu Yesu, Naamba kikye kufuma pansi ya muchima wami. Kechi mambo akuba mba Amiwa ne umo wa mwi anweba, kechi mambo akuuba mba Amiwa ne muntutu ungi ne, pakuuba ke umo wakulwa waomvwewa na Mashi. Naketekela mba akya Kyeya kimo kyakobama mu kino kipwilo, bufuku buno, awa yeka Umo umwesha, mu musango Wanji, amba Ye Yesu Kilishitu, mu musango wa Mupashi Wazhila.

¹⁰⁰ Muntu yense wayuka Kinembelo, wayuka mba Yesu waambile mba, "Nafuma kwi Lesa, kabiji Ngya kwi Lesa." Kasa Akyangye kulengwa bu muntu ne, kimye kyo ajinga ne Mosesa mungyetu, Aye wajinga Mumbulungwa wa Mujilo. Kabiji kimye Mosesa kyo akebele mba Amumone, Aye wapichile mu bifulo Byanji bya kunyuma. Kabiji Mosesa waambile mba, "Kyamweka nobe Muntu." Kimye kyo Ajinga pano pantanda, Aye wajinga Muntu. Aye waibile bintu bimo byo Abena kuuba, leelo, kupichila mu bantu Aye bo akujile. Apa Aye waiya ne kipikichala Kyanji kyakopwa. Akye kyo kika?

¹⁰¹ Panyuma ya lufu Lwanji, kuzhikwa ne kusanguka, Paulo wajinga palwendo Iwanji lwa kuya ku Damasakasa, juba jimo, kabiji Kyeya kikatampe kyamuponejile. Aba bantu

bamuzhokoloka aye kechi wamwene Kyeya ne. Pakuuba Kyaishile kwi Paulo, poso byo Kyamulenjejile kwikala mpofu. Aye wajinga na lukatazho na meso anji moba onse a bumi bwanji. Kabiji waambile kimye kimo, “Kuchina kuuba mba Nakatumbijikwa na kuvula kwa lumwekesho, lwapewe kwi amiwa,” mwiba mu musunyi wanji, muluwe wakwa Satana, na kumumanyika. Mambo kyajinga kuvula kwa lumwekesho.

¹⁰² Kabiji Paulo byo aponejile pansi, palwendo lwanji lwa kuya nakumanyika bantu baubilenga kyongo kyabaya bingi; jibumba ja basemwa-jibiji, bantu batelelwe mba bancha. Paulo wajinga mu lwendo lwanji lwa kumanyika booboo, na bipepala mu pokochi wanji, na kwibakasa ne kwibaleta ku Yelusalema. Kabiji pakachi ka juba, kwaishile Kyeya pansi, kya mufikijile ku maulu anji, kufika ne pansi, kabiji aye waponejile mu lukungu lwa pansi. Kwaishile Jiwi kufuma mu kyokya Kyeya, kwaamba mba, “Saulo, Saulo, kika kyoumanyikila Amiwa?”

¹⁰³ Kabiji Saulo waalulukile, mu musango wanji wa bumpofu, watajile peulu. Kabiji wakonsheshe kumona akya kikatampe, Kyeya kya lukumo. Kabiji aye waambile mba, “Nkambo, Yenu Bang’anyi?”

¹⁰⁴ Aye waambile mba, “Amiwa ne Yesu. Nafumine kwi Lesa; Nayile kwi Lesa. Nafumine kwi Lesa; Nkabwela kwi Lesa.” Aye waambile mba, “Kyakosa obewa kupata kulu kobe ku miba.”

¹⁰⁵ Lumwekesho lumo pa yewa musengo wazhijila, kimye kimo pa kyokya kifulo, muntu kechi wakonsha kwikala musango umo ne. Muntu, kasa akyangye kwiita ayemwine mba Mwinakilishitu, kasa akyangye kwimwesha ayemwine ne, wafwainwa patanshi kwikala na kyakupitamo kya kunyuma-kulubaji-lwa-kiselebwa, ako ko akumenye Lesa, kilungi ne kilungi.

¹⁰⁶ Mambo, leelo, wakonsha kwikala na mukumbu uji yense. Mwakonsha kumona Nkambo wauba kintutu kimo Aye kyo aambile mba ukoba, kabiji bajimuka ba masukuulu a mamboawama ba Kekilondolwela kwalepa. Bakamba mba, “Akya kyajinga kya juba jikwabo. Kyajinga kya *kikye*. Nangwa, Ke kya mu nkulo ikwabo. Nangwa mba, Kyatama.” Nobe byo baambile ne Yesu, “Aye ye Belezebabuba, ye diabola. Aye ubulang’ana biji mu bumi bwa bantu.” Kabiji ne byonse bye bintu, baji na mukumbu.

¹⁰⁷ Pakuuba inge muntu waiya mu kukwatakana ne Kilishitu, kabiji wamumwene Aye nobe byonka byaubile Paulo, nangwa Aye wamukumenye, kechi kujipo bafunda ma sukuulu amamboawama mu ntanda wakonsha kulondolola wafumyako muntu ne.

¹⁰⁸ Ao oene mambo, leelo, kechi bajipo na byakupitamo ne. Ao oene mambo kyo bakonsha kubula kwambila...bonse babena kwamba mba, “Awe ye Ng’anyi? Akye kyo Kika? Kwepi ko

Kyafuma?" Abo kechi baji na mukumbu ne. Kika? Mambo, abo kyo bayuka ke masukuulu a mamboawama alengwa na kipwilo. Kechi "kuyuka bya masukuulu a mamboawama" bo Bumi ne. Kechi "kuyuka Baibolo" bo Bumi ne.

¹⁰⁹ Bino "kumuyuka Aye" bo Bumi. "Kumuyuka Aye" nobe Mupulushi obe, nobe ye Umo Wakuyuzha na Kyeenyi Kyanji. Obewa wajingako byo kyamwekele. Kechi pajipo muntu umo wakonsha Kwikifumya kwii obewa ne. Kechi kujipo nangwa umo wakonsha kwii Kilondolola kukutwala kwalepa ne. Umvwe akya kyakupitamo kya kumwekela obewa, umuyuka mba Awe Yeng'anyi. Kwi amiwa, Aye ye Yesu Kilishitu ujitu pamo keesha, leelo, ne myaka yonse.

¹¹⁰ Awe ye ng'anyi ubena kwingila bibye byakukumya? Awe ye ng'anyi ubena kuuba iye mingilo ikatampe? Bushe ye musapwishi? Bushe ye Oral Roberts? Bushe Billy Graham nyi? Bushe ye Jack Schuler? William Branham? Yense ye kyafwainwa kwikala, kechi bajipo na kimtu kimo kya kwingila nakyo ne. Abo kebingijishotu.

¹¹¹ Ke Mupashi Wazhila ubena kwiya na Mamboawama, mu biyukilo ne bya kukumya, pakuuba mba anengezhe bantu. Mwela wayulwamo na byaluketekelo, na baitabila babena kuketekela mba Aye ubena kwiya.

¹¹² Kabiji bakwabo babena kwamba mba, "Kika kukwe kusangululwa? Kika kyo twaikela nako? Twayai twikale ku kipwilo." Kika, kyaambiwa mu kipwilo ponka pano, amba, kimye kyotwatatwile kushimika kipwilo kyakatataka, baambile mba, "Atweba kechi tukeba bya kukumya ne. Atweba kechi tukeba bibye bintu ne. Mubena kwibikeba, waya mu mwingle mo bimweka. Atweba kechi twibikeba muno ne." Inge Branham Tabernacle waikila pansi pa kyokya kifulo, nishi kyaibila.

¹¹³ Akino kipwilo kyaimikwa pa bishinakata ne Bulume kabiji ne Mamboawama akwa Yesu Kilishitu. Kabiji kikulutu awe tabbanako waimana, lekai aye Mupashi Wazhila walukumo afike pa myeo, mu kupulusha, kabiji ne kuyuzha na Mupashi Wazhila, kabiji ne kubuka bakolwa. Kwi amiwa, ke Yesu Kilishitu ujitu pamo keesha, leelo, ne myaka yonse.

Twayai tulombe.

¹¹⁴ Inge kechi wamuyuka byo Aji Aye ne, obewa kechi wayuka byonse bye ne, kabiji obewa wakonsha kutemwa kuyuka, wakonsha kusutulako kuboko kobe? Kabiji ne kwamba, pa kusutula kuboko kobe, "Ndombelelaiko, Mulongo Branham, amba Namuyuke Aye." Kabiji Nkambo emupeshe. Kabiji ne bonse bazhokoloka, Namona maboko enu.

¹¹⁵ Pano, Taata Wamwiulu, twaleta iye Mbila, ne bipangwa bya bantu babena kusutula maboko abo, amba bafwainwa kuyuka Awe Ye ng'anyi. Babena kukeba kuyukanyikwa kwii yuwe Yesu mukatampe. Amba, Kwiya Kwanji, kwa lusanguko,

kujitu pepi, poso bakolwa batatula kutambula lubuko. Kabiji panyuma ya kyokya kyamweka, nanchi bungauzhi bwatwelele mu Kipwilo, pano ke bya bupe ne bya kukumya, pano kufika ne ku kyokya kiyukilo kyapelako. Kyalondelopo kwiya, ke Kushikulwa, Kipwilo kikasendwa. Kabiji atweba, Nkambo, abo baamba mba Anweba twimuyuka mu Bulume bwa lusanguko Bwenu, tubena kupembelela, kabiji tubena kukabila, ne kujila, ne kusashijila, "Iyai, Nkambo Yesu!"

¹¹⁶ Shikulai Kipwilo Kyenu kabiji ne Kwikisendapo, bukiji bukiji, Nkambo. Mambo, bukumotu, bantu bakonauna ntanda ayo Anweba yo mwalengele amba bekalepo, mambo akuuba mba bakakalwa kwi mukokela Anweba. Kechi bafunda mutnde ne, pakuuba bafunda nkondo. Abo kechi bafuda bololoke ne, bafundako byubilo byatama. Kyakuuba mba bonse kechi bakalwilanga luisa ne! Nkambo, akya kifulo kicheche mu michima yabo kibalengela kwikalala nazala ya bulume, babena kweseka kutambula mutende mu lambolitali kuntu kumo, pakuuba mba bonaune muntu mukwabo.

¹¹⁷ Lesa, inge bakonsha kuvuluka mba abwa bulume bo babena kukabila ke Bulume bwa lusanguko lwa Mwaana wa Lesa, Bulume bwa Mupashi Wazhila bwakwalula bumi bwabo; konauna byaalo, pakuuba bapipulai bumi bwabo ne kwibalula ke bakalume Benu.

¹¹⁸ Bantu bavula, bafikilwa na kivundakanya, batutongola atweba mba jibumba ja "babula kuyukapo nangwa kimo ne," kabiji—kabiji nobe "bamyendeleko," byonka byo baubile mu juba jitansi. Bino byo babwelele, ba sekejile, ne kwimusachila Anweba amba bakonsha kusenda myendeleko ya Jizhina Jenu. Ayo yo ng'umvwino ya baana Benu, bufuku buno, Nkambo, konse konse. Atweba tuji bingi na lusekelo.

¹¹⁹ Bamo mu juba Jenu baesekele kwimuyuka Anweba. Baambile mba, "Aye ke mulunda wayewa muntu wamungye, Yoano, wafumine mungyetu kwakubula byakumvwala ne, wipombatu ka kiseba ka mukoko wakala. Muntu wamungye ulubakanya byambo, musela ne muzhika, kabiji ne kwamba mba, 'Kapasa bekakungika kala ku muzhazhi wakichi.'" Waambile mba, "Aye ye—ye wakumulondela. Aye ye muntu wamungye. Aye ke muntu wakonya. Aye wafuma mu milanguluko Yanji." Awa mwingilo wajinga ne Anweba, Anweba Nkambo, mwapofwele meso abo.

¹²⁰ Kabiji nanchi byokiji ne jikwabo leelo: Awe Mupashi Wazhila mukatampe watangijilenga Kwiya kwa Nkambo, byonka Yoano byo aubile mu juba janji, nakumpofula bantu, ku booba babula kukeba kumona. Pakuuba ku booba basaka kumona, Anweba mwibasalulula. "Kabiji bonse bo Bapa kwi Bataata bakeya kwi Amiwa," Anweba mwaambile mba, "kabiji kafwako nangwa

umo ukalubilamo ne. Kabiji Kamusangula mujuba jikapelako.” Twimusachila Anweba pa kikye.

¹²¹ Kabiji ne boba basutula maboko abo, bufuku buno, twalomba, Anweba Nkambo Lesa, amba Anweba musakwimwesha Anweba bene kuyukanyikwa, mu kyakupitamo, mu Bulume bwa lusanguko. Kiswishai kye, Nkambo.

¹²² Kabiji bakwabo kape baji muno, babula kusutula kuboko kwabo ne, bino nangwa byonkabyo, mu michima yabo, bayuka mba bekikebelenga. Nalomba mba Anweba musakwibapesha, ne kupana ku byakukabila bya michima yabo.

¹²³ Umvwe twafuma mu kishimikwa, bufuku buno, twafwainwa kuya nobe bantu bapusanako. Lekai tuye na kintu kimo kyapusanako kukila byo twajinga nakyo, pakwiya, inge kyajinga kyapusanako na Kyaswa muchima wa Bulesa. Lekai tuye nalupata lwa kukwachijila ku masengo a kitapisho, poso Mweo watondwa amba twaikala na kyakupitamo ne Anweba kabiji twayuka Mwing'anyi mo twaamba, mambo twakikumukumanya Aye ne kumuyuka Aye, kabiji twaikala na lumvwang'ano lwabupopweshi Nanji. Swishai bibye bintu, Taata. Bukai bakolwa ne bamanyikwa.

¹²⁴ Peshai kafunga wetu watemwikwa ne kuwama. Lesa, twalomba mba Anweba musakwikala nanji ne banyenga yanji batemwikwa, nobe byo bembra Mamboawama, ne Kwikisapwila pa waileshi.

¹²⁵ Mpeshai benyi baji mukachi ketu. Nkambo, lekai balupuke, bufuku buno, na mukambizho wa mu muchima wabo, kabiji ne kufukula kwakuuba mba, kufuma pa kino kimye kuya kulutwe, inge kechi be muyuka Anweba kabiji kechi bakimwingijilapo kala Anweba ne, kunyuma, balekai be mwingijile Anweba. Byo twayuka kikye, amba, “Bintu byonse bikwabo bikapelelamotu, pakuuba Kyambo kya Nkambo kikekala kikupu.” Kiswishai kye, Taata.

¹²⁶ Tulekelailko, mambo etu onse. Kabiji lekai tukakumane pa kyokyo kikatampe... [Kafwapo bijipo pa tepu ne—Waku.]

Mambo Ye mutanshi watemenwe
Kabiji wapotele lupulukilo Iwami
Pa Kalvali pa kichi.

¹²⁷ Pano, panyuma ya Mbila, twayai tukunyike mitwe yetu ne kumupopwela Aye, byo tubena kumwimbila Aye.

Namutemwa Aye,
Na muchima wenu yense.

Namutemwa Aye
Mambo Ye mutanshi watemenwe
Kabiji wapotele lupulukilo Iwami
Pa Kalvali pa kichi.

¹²⁸ Baanga bamutemwa Aye? Sutulai kuboko kwenu, ne kwamba kikye na bukamonyi mba, "Namutemwa Aye." Oo, bushe Aye kechi wawama nenyi? Mwayukatu, Natemwatu kwikalayi myuwe musango kabiji ne kutoma mukachi, mu musango umo, Kyeenyi Kyanji. Kyambo Kyanji, kyaambiwa, Kyaponena mu michima. Kitolola. Kituleta mu kukokela Mupashi wanji. Byo kyawama kya kumupopwela Aye ponkapa! Pano, byo mubena kufuma ku kipwilo, bufuku buno, yainga, na kumumpopwela Aye.

¹²⁹ Kabiji vulukai, uno mulungu, kuji mbung'eno ya milombelo bufuku Pakisatu. Kechi mulubeko Mulongo Neville uka bijikanga pa Mulungu, nangwa pa Kibelushi, pa naini koloko, pa WLRP. Natemwa kwibomvwa, kechi ibyo nyi? Kwimba buna, nangwa busatu, bomvwanyikambingi bulongo. Bakazhi ne Amiwa, ne baana, tushikula ka waileshi kakacheche ne—ne kubungakana kwi ako, kuteleka kwi Mulongo Neville ne busapwishi bwanji, kabiji ne byambo byanji byawama, byo atumbijika Lesa awo ye atemwa ne kuketekela. Kechi mwambe kikye ku...

¹³⁰ Anweba benyi muno, inge kechi muji na kipwilo ne, iyai mukwatakane ne atweba. Amiwa ne mubuula, kechi kwamba kikye mambo waikala papo ne. Ine, mwane. Naamba kikye, bimye byavula. Natemwa Mulongo Neville. Akye, kitanshi, aye ke wafunda masukuulu amamboawama. Kintu kitanshi, aye ke mwaana wakwa Lesa. Kintu kyalondelapo, aye ujitu pamo pajuba pajuba. Amiwa namuyuka pa myaka yavula. Aye kechi wackingya, nangwa pacheche ne. Aye ukijitu Orman Neville, kalume wakwa Nkambo Yesu. Kabiji Naketekela mba uji na...

¹³¹ Bufuku bukwabo, Namwichile, na kumwipuzha inge kechi waubile ne, mu mutanchi wanji, kyakonsha kwikalayi na mpuzha yetu ya kwiya na kulombelela bakolwa. Kwajinga bamo baishilenga, kyajinga lukeelo luno, mwayukatu. Kabiji mukazhi wanji mucheche wakumbwile foni, kabiji Naambilenga ku bakazhi bami, kunyuma kokwa, pa kikye.

¹³² Kabiji byo tubena kusachila Lesa pa mukazhanji watemwikwa mucheche ne kisemi kyanji. Akyo kyawama bingi. Inge mwamona wamwingilo ne mukazhi wanji baikala bulongo byobya, mu buwame ne kwikeyepesa, akyo kilengela kipwilo kuya bulongo. Akyo kiwaminakotu monka muyila moba.

¹³³ Mwamutemwa Aye na muchima wenu yense? Kijitu bulongo. Tuji na lwimbo wakulupukilamo ye twimba, *Yanga Najo Jizhina Ja Kwa Yesu*. Kabiji tupai pa kusawila pacheche, nyenga, inge uji nanji mu buuku. Kabiji tusa kwimba lwimbo wetu wa kulupwilamo bantu. Kabiji umvwe twaimba veeleshi mutanshi, twakeba kwaluluka, imunaipo mu maboko a mukwenu. Kijitu bulongo. Tupai pa kusawila.

...Jizhina ja kwa Yesu,

Mwaana wabulanda ne wamalwa;
 Jikakupa lusekelo ne lutekenesho,
 Yanga Najo konse konse.

Jizhina Jawama, Byo jawamisha!
 Luketekelo lwa ntanda ne lusekelo lwa
 Mwiulu; (Lesa akupeshe, mulongo.)
 Jizhina Jawama, Byo jawamisha!
 Luketekelo lwa ntanda ne lusekelo lwa
 Mwiulu.

Twayai tutole yuwe veeleshi pano:

Pa Jizhina ja Yesu nakufukama,
 Kupona kikuvumene ku maulu Anji,
 Mfumu wa bamfumu Mwiulu tukamuvvika
 Aye,
 Kimye lweendo lwetu byo lukapwa. (Bushe
 kyokyo kechi kikawama nenyi?)
 Wawama . . . (Jizhina Jawama!) Byo
 jawamisha!
 Luketekelo lwa ntanda ne lusekelo lwa
 Mwiulu;
 Jizhina Jawama, (Jizhina Jawama!) Byo
 jawamisha!
 Luketekelo lwa ntanda ne lusekelo lwa . . .

¹³⁴ Baanga bavuluka lwimbo wetu mucheche ye twaimbang'a,
Kechi Mulubeko Milombelo Ya Kisemi ne? Mwamuvuluka
 nyi? Amiwa kechi . . . Thelma, kana mwayuka kyokyo, nangwa
 kusaula, nangwa ine? Twayai tumweseke jimo. Kechi
 mwamuvuluka nenyi? Twayai . . . Kapepo Nakonsha kumweseka
 jimo ne anweba.

Kechi mulubeko milombelo ya kisemi ne,
 Yesu wakeba kukukumanya kokwa;
 Aye ukalama kukabila kobe konse,
 Oo, kechi mulubeko milombelo ya kisemi ne.

¹³⁵ Baanga baji na milombelo ya kisemi? Akyo kyawama.
 Twayai tumweseke ne jikwabo. Amiwa nsakubwela jibiji kuno.
 Natemwa kyokyo. Pano bonse pamo:

Kechi—kechi mulubeko milombelo ya kisemi
 ne,
 Yesu ubena kukeba kukukumanya kokwa;
 Aye ukalama kukabila kobe konse,
 Oo, kechi mulubeko milombelo ya kisemi ne.

¹³⁶ Anweba Nkambo, kyanembwa mu Binembelo, amba
 basendele kufuma ku mubiji wakwa Paulo tutambala
 nangwa maepulo, kabiji mipashi yatama yafumine mu bantu,
 kabiji bikola byabukilwe. Twalomba, Anweba Nkambo,
 muyewo musango, kisakumweshiwa pa bibye, bufuku buno,

byo Mbena kwintutuma ku bakolwa ne bakabila. Amwa monka mu mantanda, kuji muntu umo ubena kuketekela ne kupembelela kikye mba kimweke. Nalomba, Taata, amba Anweba musakwikiswisha mu Jizhina ja Yesu, Mwaana Wenu. Amena.

¹³⁷ Pano Nsakwipuzha, byo tubena kukunyika mitwe yetu, inge Mulongo wetu wawama Smith kokwa, kufuma ku Kipwilo kya Lesa, ye twatana kuuba mba, byonka biji Mulongo wetu Neville kuno, kwikala wakokela, wakishika, kalume wakwa Lesa, Amiwa nsakumwipuzha kulombelela mapesho pe anweba, kutwajijila mulungu yense ubena kwiya. Lesa emupeshe, poso twakumana jibiji. Mulongo Smith.

[Mulongo Smith walomba—Waku.] Ee, Nkambo. Kinswishayi kye, Nkambo. Ee. Ee. Ee. Ee. Amena.

¹³⁸ Imunai mu maboko a mukwenu. Mwatambulwilwa ne jikwabo ku tabbanako. Lesa emupeshe. 

59-0510E Awe Ye Ng'anyi?
Branham Tabernacle
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org